

«Forsa èsi in experiment per il futur»

Intervista cun Ralf Beer dals Dis da litteratura a Domat

DAVID TRUTTMANN/FMR

■ **Ils Dis da litteratura a Domat avessan gi lieu questa fin d'emna per la 30avla giada. Gia l'avust aveva il comité d'organisaziun però decis d'annular l'arranschament. L'unic punct da program ch'ha tuttina lieu questa sonda è la concorrenza litterara – il Premi Term Bel.** Era ils Dis da litteratura (DDL) da Domat ch'han lieu tradizionalmain l'entschatta da november, han stuì succumber: Ils «dis» èn vegnids annullads causa la pandemia. L'occurrenza litterara avess gi lieu questa fin d'emna per la 30avla giada.

In punct da program dals DDL ha però tuttina lieu questa sonda: il Premi Term Bel, la concorrenza litterara ch'ha schon brava tradiziun a Domat. Quest onn èn nominads ils texts da tschintg auturs per il final, texts da *Benedetto Vigne, Dominique Caglia Dosch, Martin Cantieni, Roman Caviezel* e *Sidonia Pazeller*. Nov è che l'entira occurrenza vegn organisada e mussada via video-livestream, damai tenor tuntas reglas «da l'art» dal coronavirus.

La FMR ha discurre cun *Ralf Beer* dal comité d'organisaziun dals DDL, davart stress organisatoric, experiments litterars e tandems.

FMR: *Vus dal comité d'organisaziun avais gi in patgific atun, senza nagin stress organisatoric.*

Ralf Beer: Na, insumma betg. Nus avain tuttina gi da far detg bler. Per l'ina avain nus stuì annullar l'avust l'entir program ch'era gia instradà u reservà.

Ed alura avain nus vuli tschertgar alternativs litteraras. Apaina decidì tge e co, essan nus ids vi da l'organisaziun da quel program alternativ.

Voss'alternativa è il Premi Term Bel, per il solit in dals puncts culminants a Domat. Pertge gist quel arranschament?

Nus vulevan simpla-main porscher in program litterar questa fin d'emna. Nus essan stads da l'idea: Sche in-summa insatge, alura gist il premi. Per l'ina perquai ch'igl è in impurtant punct da program dals DDL. Per l'autra na vulevan nus betg laschar ir a perder ils texts inoltrads u als «stuschar» sin l'onn che vegn. Alura na fissan quels texts forsa betg pli stads actuals u ils auturs na pudessan betg pli s'identifitgar cun lur texts d'avant in onn. Gea, il Premi Term Bel era perquai forsa il pli evident.



«Jau crai che nus hajan chattà ina buna schliaziun cun il livestream»

Ralf Beer,
dal comité d'organisaziun

E causa il lockdown avais gi ina massa texts?

Na, atgnamain betg. Tut era en la media dals davos onns, forsa 2–3 texts dapli che uschiglio. Totalmain èn vegnids inoltrads enfin questa stad 18 texts.

Pudessas declerar co la concorrenza «virtuala» ha lieu concret?

Ils tschintg finalists prelegian lur texts, in suenter l'auter, via video-livestream. Mintga text vegn discutà suenter la prelecziun dad ina giuria che consista quest onn da *Gianna Olinda Cadonau, Anna-Alice Dazzi* e *Renzo Caduff*. Suenter las prelecziuns e la discussiun, moderada dad *Anna Serarda Campell*, datti ina pausa da 45 minutas, nua che la giuria vegn a decider tgenin text che gudogna. En il fratep po era il publicum dar la vusch a ses text preferì. Suenter la «pausa» datti alura gist la pre-

miaziun dals dus premis – dal premi da la giuria e dal premi dal publicum, tuts dus vegnan sponsurisads sco ils auters onns da la Vischnanca burgaisa Domat.

Ma la gronda part dal scharm da la concorrenza litterara va a perder: la tensiun en sala, las reacziuns dal publicum, las discussiuns en il foyer davart ils texts prelegids.

Cler, i n'è sa chapescha betg la medema atmosfera sco uschiglio a Domat. Però jau crai che nus hajan chattà ina buna schliaziun cun il livestream. E forsa èsi gea era in experiment per occurrenzas futuras. Tgi sa co nus stuan organisar en avegnir tals arranschaments? Jau crai ch'ì vegnia a plaschair al publicum interessà.

Quest onn avessi dà in giubileum – la 30avla ediziun dals Dis da litteratura. Vegn la festa en quel cas simpla-main spustada?

Gea, l'idea è da stuschar sin l'onn proxim. Nus na vulain betg excluder insatge, mo perquai che tut è crudà en l'aua. Nus prendain perquai en mira pli u main il medem program, uschia che tutas e tuts han tuttina la pussaivladad da sa preschentar. L'idea fiss d'organisar in program da tandems dad auturas ed auturs rumantschs cun autras artistas u auturs, dad autras u da las medemas spartas e linguas.

Il link per guardar il Premi Term Bel da quest onn – e per participar al e-voting – vegn publicà sin www.disdalitteratura.ch.